

## Die Flerschemer Kerb iss doo

Kerweborsch!

Joo.

Wem geheerd die Kerb?

Unser.

Wem geheerd de Blunser?

Unser.

Kerweborsch!

Joo.

Saufder noch wie immer?

Noch vill schlimmer.

Saufder noch wie sunnst?

Umsunnst. -

Unn jetz singe merr allminonner: „Kerweborsch sinn lussdische Brieder, haben frohen Mu-u-ut, singe lauder lussdische Lieder, sinn joo allen Mädels gu-u-ut.“

„Kerweborsch“ gerufe unn zum Singe uffgeforderd hott uns unsern Kerwebvadder Toni unn dess bei jeder bassende unn unbassende Geleeschenheit.

Dess war im Jahr 1954, wie mir mett unserm Johrgong 1935 Kerweborsch gewese sinn unn dess wie owwe ze lese noch rufe unn singe konnde, weil doomols unn noch e paar Jahr später hotts nor Kerweborsch gewwe. Isch kumm joo nimmi uff de Kerweplatz unn waaß dessdeweese nitt, was heitzedaach gerufe werdd, wos Kerweborsch unn Kerwemädscher gewwe dut. Su wie mir „Kerweborsch“ gerufe hawwe, dess gieht halt nimmi. Unn die Dame wern joo immer de erst genennnd, also misst jetzt gerufe wern: Kerwemädscher unn Kerweborsch, wem geheerd die Kerb?

Awwer donn hott merr doch jemond vergesse. Weil merr soll joo aach nimmi bei de Oosprooch im Verein odder bei ooner Veroostalldung „Sehr geehrte Damen und Herren“ saache, ess kennde sisch joo Leit beschwern, die halt onnersders oogesproche wern wolle.

Aach su laut wie mir doomols gerufe hawwe kenne se nitt rufe, ess sinn joo dissjahr noch nitt emol zwonnsisch Mädcher unn Buwe, die die Tradition vunn de Kerweborsch wachhalle dun, wie isch uff su emm Foto geseh habb.

Wenn isch droodenke due, dass mir 42 Kerweborsch gewese sinn – su genau wusst ischs nimmi, also habb isch noochgezähld uffem Gruppebild, was sellemols de Fotograf Flesch unne onn de Riedschul gemacht hott – unn dass merr heitzedaach noch nitt emol e Dutzend junge Männer finne kann, die Kerweborsch soi wolle. Villeischd isses monschem ze bleed, e bunt Kabb uffsesetze unn sisch e Schärp um de Hals se hänge. Omm Geld konns nitt leie, ferr was hott merr Omas unn Opas.

Jetzt denke se droo, e Kerwegesellschaft ins Lewe ze rufe, weeschem Geld unn su. Doch unner onnern wärn donn nitt nor junge Leit beim Umzuuch debei, naa, aach Äldere wie mir alde 67 mol Ex-Kerweborsch kennde in den Verein oitrete unn derrfde donn mett unsere Rollatorn mettlaafe.

Iwwerischsens, mir hawwe gerufe: Die Kerb geheerd uns, unn bei uns hotts nitt de gonse Gezäwwels gewwe mett Vize-Vize, Exe-Exe, Ehren-Kerweparre unn Ehren-Beiemoosder. Erst omm Noochkerwesunndaach konnte die Vize, also de nächsde Kerweborsch-Johrgong, hinner uns beim Umzuuch uff die Gass. Die Kerb hott uns geheerd unn koom onnern.

Noch ebbes: Zu unserne Kerweborschzeit hott merr onn Kerb dess ersde Mol enn Windermondel oogezoche, weeschem Wedder unn weil merrn zeische wollt.

Eiern Honnes